

摘藻堂四庫全書薈要

集部

欽定四庫全書薈要

集部

御選明詩卷二百三

詳校官原任主事

臣李斯咏

欽定四庫全書薈要卷一萬八千六百三

集部

御選明詩卷一百三

七言絕句三

黃哲

遊洪範池與劉文正

洞門斜日照金潭  
千尺藤蘿挂石龕  
騎馬獨來高處望  
滿山松柏似江南

趙介



瑶池

宴罷瑤池暮雨紅  
碧桃花落幾番風  
重來八駿無消息  
擬逐青鸞入漢宮

嚴震直

永州舟中

瀟湘二水會零陵  
灘響惟聞浪作聲  
兩岸青山明月夜  
畫船行過永州城

林鴻

題吳江垂虹橋

雲帆秋晚過垂虹  
落日鯨波動遠風  
欲借仙家遼海鶴  
月明吹笛水晶宮

早行

前山樹暗月朧朧  
馬色雞聲共曉風  
不為逢秋多感慨  
只緣身在別離中

夢中仙遊

天葩小院敞雲屏  
鵲散星河逗客星  
欲識別來離思苦

晚風長學黛眉青

將歸海上辱羣公相送至龍津

百尺雲帆挂海霞  
勞君相送到天涯  
重來應恐清秋晚  
落盡清香桂子花

宿逆旅聞泉聲

練瀑飛泉作雨聲  
樓虛月白旅魂驚  
相思不道無歸夢  
自是離人夢不成

下山尋朱繼

攜琴載酒遠尋君  
石逕人稀半夕曛  
縱醉也須上山去  
莫教閒却半牀雲

浦源

并州寒食

夢入故園千里遠  
覺來寒食在并州  
垂楊不是相思樹  
那得花開便白頭

酬于秀才

酒醒題詩憶送君  
殘陽半掩竹間門  
相思昨夜空齋裏

燭滅香爐火尚溫

寄熙上人

孤愁無處覓高僧  
欲問楞伽竟不能  
遙想山中禪定夕  
半窓殘雪一寒燈

送友人

孤舟春別萬花西  
雲淡山青水滿溪  
料得客愁何處是  
綠陰官舍聽鶯啼

題青山白雲圖



青山欲轉綠溪迴  
古木春雲掩復開  
不識桃源在何處  
但看流水落花來

晚過張林山

名山幾度欲尋幽  
此日雖來不暇遊  
一棹黃昏過山下  
疎燈絡緯滿林秋

留別甘露行師

秋山松柏正參參  
游子登臨酒半酣  
今夜阿師雖對面  
明朝江北望江南

周玄

題陳大宅方壺子層層雲樹圖

昔年曾記秦川客  
雲樹參差去欲迷  
日暮孤舟行不盡  
鷓鴣啼處渭城西

寄涵江陳韞玉

南望涵江無盡期  
蕭條還解憶荆扉  
相思豈道音書少  
祇為春來雁北飛

林敏

期宗人林大遊華藏海

巾舄行歌接梵筵偶來松下草芊芊也知只在秋雲裏  
潭水溪花到處禪

趙迪

晚眺

白雲深處野人家倚杖閒吟日未斜江上數峯看欲盡  
晚鐘殘月入蘆花

客中元夕

花市銀燈夜向深  
香風羅綺迴沈沈  
不知何處笙歌起  
傳得新愁上客心

述懷

門掩秋塘楓樹青  
斷猿疎鳥起寒汀  
長安道上花如錦  
山鳥林間笑獨醒

為黃宗武題扇

蘿逕飛花靄暮春  
清泉白石淨無塵  
不知浮世紛紛日  
門掩青山有幾人

楊性

題趙承旨竹石圖

錯刀光彩照琅玕  
龍影常從石上看  
六月酒醒開草閣  
滿天風露作秋寒

徐尊生

春山樵唱

共穿石徑踏春晴  
却向山腰分路行  
樹暗雲深莫相失  
隔林遙認唱歌聲

歸舟雜詠

溪雲黯黯覆溪潭  
雲罅疎星見兩三  
半夜不知何處雨  
遙看飛電閃淮南

朱世濂

瀧湫和韻

竹外煙浮僧煮茶  
草邊風暖鹿眠沙  
青鞵何處看山客  
瀑布巖前數落花

梁寅

為王仲義題雪梅

小橋東郭先生履曲徑西湖處士家  
向暖早看花似雪  
冒寒更愛雪如花

和何彥正春耕

見說春耕溪水頭賦詩猶憶玉京遊  
莫誇塞北千蹄馬  
寧買江南十角牛

竹間樵徑行應熟花外漁舟望欲迷  
處處稻畦分落照  
荷鋤人去水禽啼

殷弼

望海

吳淞江口海門東萬里京師咫尺通  
白柁紅旗三月浪  
紫簫花鼓午潮風

王賓

越來溪

吳人舊地越人開岸上誰將柳樹栽  
春水綠波三二月  
畫船全是賽神回



韓奕

惜春

漠漠晴光淡淡天  
山青水白景依然  
杜鵑啼處花如雨  
白髮傷春又一年

晚晴

水國秋來少見晴  
夕陽忽映小窓明  
西風颯颯林間葉  
乍聽猶疑是雨聲

天平寺看梨花

幾回扶醉繞花行  
漠漠如雲映晚晴  
白髮如今僧寺裏  
雨中獨對過清明

王履

玉女峰待月

萬松林裏夜蕭蕭  
月影來時轉寂寥  
試看影從何處起  
正東峰上水波搖

沈夢麟

趙待制席上

春城飛絮日顛狂  
簾幕風微燕子忙  
醉後不知羅袖薄  
牡丹花上月如霜

劉仔肩

望闕口號

闔閭排雲寶殿開  
千官鵷鷺早朝回  
不知誰獻王褒頌  
得奉君王萬壽杯

王沂

秋江送別圖題贈黃通守允中

秋江木落楚天低  
目送歸船渡聶溪  
莫道浮雲千里隔  
君山只在洞庭西

季應期

寄吳彥升

積雨連朝過客稀  
亂紅墮地綠陰肥  
江南祇是歸耕好  
水遶孤村燕子飛

錢子義

題畫

夕陽淡淡柳絲絲遠浦長天欲暝時腸斷楚山春雨後  
鷓鴣啼向女郎祠

梁蘭

迎祥觀

石徑雲深長綠苔仙家樓閣絕纖埃空庭盡日無人到  
山鳥窺簷時下來

鄭濁

海棠仕女圖

春風蕩漾百花潭  
翠袖迎風酒半酣  
好鳥隔窗催曉色  
美人殘夢到江南

吳子莊

小景

杖藜日日看芝山  
山下浮雲共往還  
昨夜小溪新水漲  
釣船流到寺前灣

王珙

溪橋晚步

日日陰雲思寂寥  
偶因新霽過溪橋  
不知門巷春多少  
柳外一聲婆餅焦

丘輔仁

南湖

南湖二月水如天  
羅綺東風醉少年  
十里好山多看盡  
琵琶催撥夕陽船

顧協

舟中次韻

西風吹老白蘋花獨倚歸舟感物華  
漠漠秋雲暗山谷不知何處是吾家

孟夏書事

脫却朝衣換布衣始知今是昨  
來非綠陰庭戶無人到惟有一雙新燕飛

謝常

和靖觀梅圖

孤山歲晚水迢迢竹外橫斜挂綠么  
吟到暗香疎影句



黃昏月上雪初消

攜琴訪友圖

秋林紅葉晚蕭蕭  
乘興攜琴過野橋  
人在翠微尋不見  
白雲如練束山腰

劉子建

浦城漫興

清溪何似百花潭  
谷口雲峰半夕嵐  
借問子真歸隱未  
鷓鴣春雨滿江南

陳士楚

書錫山驛

嗚嗚畫角冷涵秋一曲梅花動暮愁  
不管江南斷腸客  
夜深吹上月明樓

沈應

次錢文伯題雲林詩韻

紅葉橋邊草舍低半灘斜照水平溪  
舊時曾記題詩過  
疎雨桐花一鳥啼

看山

老年已免綴朝班  
林下於今許我閑  
流水小橋紅葉逕  
杖藜隨意看青山

江中曉行

江店雞鳴促去橈  
月斜灘口又平潮  
楚天不盡吳天遠  
煙樹和愁望轉遙

春夜

綵牋吟遍惜春詩  
花隱紗窓見月遲  
欲問海棠持畫燭

自嗟不是少年時

半輪月映杏梢頭  
小院朱簾却上鉤  
鶯怯輕寒猶未睡  
畫闌西畔替人愁

史謹

書鐵爐驛

銅鼓營前日欲西  
鐵爐岡下鷓鴣啼  
却憐迢遞南來使  
萬壑千崖入甯溪

直房聞桂香

松陰池館晝偏涼  
何處飄來桂子香  
起傍雕闌看秋色  
廣寒宮殿近昭陽

蜀中道中

盤盤鳥道接我峴  
劒閣橫空北斗低  
羈思不堪過夜半  
萬山深處一猿啼

桃葉渡

重經古渡立斜曛  
愁見桃花兩岸春  
欲向東風唱桃葉  
江邊怕有別離人

湘江夜泊

扁舟載月下三湘  
露渚風來杜若香  
一片秋聲無處著  
和愁散入水雲鄉

九日次周縣宰韻

映水芙蓉簇絳霞  
水邊開宴坐臨花  
秋娘老去風流盡  
繫臂猶懸一縷紗

題畫

數株煙柳綠粼粼  
兩岸青山起暮嵐  
多少天涯未歸客

却從畫裏看江南

石光霽

太學夜宿

蠟炬燒殘夜二更高齋蕭爽客懷清  
山林只在虛簷外錯把風聲作雨聲

方孝孺

二月十四日書事

斧戔臨軒几硯閑春風和氣滿龍顏  
細聽天語揮毫久

攜得香煙兩袖還

風軟彤庭尚薄寒  
御爐香繞玉闌干  
黃門忽報文淵閣  
天子看書召講官

感舊

盃酒論心有幾人  
天台張穀舊相親  
近來詩句多奇語  
書比藏真更絕倫

精通八法楊文遇  
暗誦五經陳用中  
揮翰天庭應獨步  
忍饑村巷欲成翁



彭山道中

煙鳥歸林已夕陽  
野人相引度高岡  
馬頭一片青山影  
經過絺衣似水涼

夜渡桑洲驛

山路彎彎石甃平  
碧天涼露下三更  
無端一夜西風惡  
吹著新愁上紫荊

題菊

順流舟楫日邊回  
古木軒窓水際開  
萬里西風數行雁

送將秋色過江來

鸚鵡

幽禽兀自轉佳音  
玉立雕籠萬里心  
只為從前解言語  
半生不得在山林

練子寧

秋日作

水精簾動桂花風  
湘簟涼生八月中  
魄落西窓銀燭裏  
烏絲雪蠶寄秋鴻

卓敬

栽梅

風流東閣題詩客  
瀟灑西湖處士家  
雪冷江深無夢到  
自鋤明月種梅花

程本立

題山水釣魚小畫

人間萬事一絲輕  
江上數峰雙眼明  
老我不歸空看畫  
秋風又到洛陽城

題梨花錦鳩圖

萬花深處語黃鸝  
花底能無挾彈兒  
自在兩鳩春寂寂  
一枝晴雪立多時

華陰駐馬橋

絕谷層關路屈盤  
斜岡側嶂石巔圠  
今朝駐馬橋頭立  
華嶽三峰正面看

茅大方

題揚州瓊花觀

秦山楚水路迢迢不道瓊花亂後凋鶴背仙遊清夢遠  
月明誰度紫鸞簫

高遜志

茗川夜宿

山遶荒城水自流霜空月色滿溪樓夜長欹枕渾無寐  
二十五聲都是愁

題陸濱村舍壁

記得移家白露時秋風又是一年期獨憐零落溪邊柳

那得長條繫所思

次葉楚芳見寄韻

梅子初黃晚雨收  
閒身猶著木絲裘  
誰憐白苧新裁就  
回首西風又是秋

題盧元佐所藏江山圖

結茅曾住白雲間  
游宦多年客未還  
開卷偶然鄉思動  
數峰渾似鄂州山

題陶淵明像

玉山頽矣葛巾偏老僕扶持步不前莫道先生渾不醒  
醉中猶記義熙年

鄭桓

洪武癸亥春以公事出會寧北境

雪山高聳入青雲下有黃河一帶分粉堞數家高作塞  
黃羊十百動成羣

沙蔥野韭隨時采蘆酒黃牛取次嘗萬里驅馳關塞外  
忽驚風物憶江鄉

唐之漳

秋夜懷孟熙

西風卷海作濤聲  
燭影簷花徹夜明  
況有懷人心似雨  
暗隨秋點出江城

次孟熙韻

百頃清江一草廬  
鄉人齊識病相如  
不知吟得秋多少  
柿葉紅時好細書

龔詠



自題晚歸圖

紅樹離離映夕暉  
水天空闊雁高飛  
扁舟一箇輕如葉  
常載先生半醉歸

與王忠孟登玉峰共飲春風亭

山水千重複萬重  
少年相別老相逢  
春風亭下一杯酒  
山色不如人意濃

孟忠

登馬鞍山感述

汲水堤邊楊柳花東風吹散五侯家江南一去繁華遠  
夢覺青山自煮茶

袁敬所

題淵明五柳圖詩

藜杖芒屨白布裘山中甲子自春秋呼兒點檢門前柳  
莫遣飛花過石頭

回朝即事

赤闌紅映夕陽齊蹀躞天驕度不嘶近侍報來應鎖閣

乘輿又過御橋西

解縉

赴廣西別甥彭雲路

多情為我謝彭郎采石江深似渭陽相聚六年如夢過  
不如昨夜一更長

過全州

陶生巖畔草青青唐介墳前江水聲兩岸鷓鴣啼不盡  
畫船撾鼓過全城

寄黃玄齋

來時蕭峽駐輕舟惆悵初年作遠遊  
夢裏相思不相見武功山下月輪秋

龍州

波羅蜜樹滿城闌銅鼓聲喧晝賽神  
黃帽葛衣墟市客青裙錦帶冶遊人

楊士奇

發淮安

岸蓼疎紅水荇青  
茨菰花白小如萍  
雙鬟短袖慙人見  
背立船頭自采菱

以絹問張子俊求畫

夢憶衡廬紫翠重  
結巢須倚玉芙蓉  
天恩未便教授綬  
一幅鵝溪更惱公

清明有感

西江南望渺天涯  
歲歲清明不在家  
蕩日飄風無定著  
亂人情思是楊花

題少保楊澹菴江鄉歸趣圖

巴陵西畔楚江分，曾泛湖波望嶽雲。  
借得君山小龍笛，月明吹向洞庭君。

江上早行

漢陽磯上鼓初稀，煙柳朧朧一鵲飛。  
乘月不知行處遠，滿江風露濕人衣。

過城陵磯

城頭水落石層層，石上魚檣半搭罾。  
忽望高樓出城郭，

舟中指點說巴陵

金幼孜

元夕午門觀燈應制

閭闔重重夜不扃  
瓊樓十二敞銀屏  
東風一曲昇平樂  
此夜都人盡許聽

李至剛

題雲林畫

故家池館錫山阿  
門逕寧容俗士過  
清閼閣空詩社散

蛛絲窓戶落花多

趙子固水仙

水精宮闕夜不閉  
仙子出遊凌素波  
為愛低頭弄明月  
不知零露濕衣多

趙玘

城南書事

三年為客寄龍沙  
望斷南雲不見家  
惟有受降城外月  
照人清淚落悲笳



胡儼

永樂八年春二月被詔直內閣即事

清曉朝回秘閣中坐看宮樹露華濃  
綠窓朱戶圖書滿人在蓬萊第一峰

浩蕩東風雨散絲暗移春色上花枝  
雲陰半捲龍樓晚正是詞臣退直時

題鳴鳩拂羽圖

日暖風暄淚竹斑鳴鳩拂羽樹林間  
眼中正是春光好

喚雨呼晴莫等閑

題畫

遙看瀑布落寒青  
野服烏巾自在行  
好似匡廬讀書處  
滿林紅葉夜猿聲

王達

雲林南渚圖

石苔凝綠上松根  
前輩空留翰墨存  
寂寞雲林堂下路  
一峰殘雨映孤村

題雷公山

青山不斷勢蜿蜒上有雷公屋數椽一片黑雲龍起處  
北風吹雨作豐年

御橋官柳

長條嫩葉綠婆娑弄雨調煙夾御河攀折年來何太苦  
只應當路送人多

王璠

早朝待漏題楊諭德竹

禁鐘纔動曉風微  
新竹疎疎對瑣闥  
不是日高簾不捲  
怕教空翠濕朝衣

題畫

渡頭初唱采蓮歌  
南浦西風漲綠波  
正是晚涼新雨後  
青山不似白雲多

漁村

汀葦蒼蒼白露凝  
一灘寒月未收罾  
西風吹醒江南夢  
四壁蛩聲半夜燈

方壺畫

紫府深沈白晝閑  
仙人歸去邈難攀  
當時暫謫來塵世  
寫遍江南雨後山

王僊

題米老山水

海岳菴前覓舊蹤  
蒼茫雲樹米南宮  
別來幾片青山影  
都付寒鷗一蓼風

題畫鵲

原草飄殘作雪絲日斜馬上鬪歸時五陵別後傷心事  
零落涼州笛裏吹

雨中過洞庭

昨夜南風起洞庭曉來湖上雨溟溟忽看天際驚濤白  
失却君山一點青

重登岳陽樓望君山

南湖煙水接天流天際青螺掌上浮欲弔湘君何處是  
不堪重倚岳陽樓

登月江樓

仙人槎  
浦也

朝來一上月江樓  
江雨長涵瘴水流  
望斷釣槎人已遠  
青山點點是邕州

交州即事

一騎衝嚴到市橋  
夕陽煙樹草蕭蕭  
居人猶指高駢塔  
碧瓦朱甍尚未凋

九日黃司空招飲不赴書以答之

菊觴萸豆有佳期  
客裏憐君慰所思  
不是叅軍招不赴

病來烏帽未勝吹

王恭

漁笛

扁舟吹笛度橫塘  
欸乃聲中也斷腸  
莫道漁郎無別恨  
武陵雖好是他鄉

聞子規

枝上聲聲怨落暉  
居人聞此也沾衣  
啼時莫近湘山路  
更有長沙客未歸



詠秋風

青蘋江上響蕭蕭  
吹得林間萬葉飄  
何處淒涼最闕別  
數株殘柳灞陵橋

村居

草徑茅扉帶軟沙  
隔林雞犬幾人家  
青山盡日垂簾坐  
落盡棕櫚一樹花

哀柳

西風昨夜灞陵秋  
千樹蕭條帶驛樓  
莫道離人空有恨

暮蟬寒雀也關愁

海城秋晚

西風一雁海城頭  
羌笛聲中水亂流  
楓葉蕭蕭山月下  
戍樓殘火幾家秋

山窓夜雨

深澗垂蘿暗竹房  
半枝殘燭雨聲涼  
蕭條樹葉千峰裏  
不獨猿啼斷客腸

海上送別林崇高先輩

海上新晴野水春  
煙村花鳥送行塵  
十年客路堪惆悵  
況復今朝別故人

月下聞箏

愁心不見薛瓊瓊  
何處銀箏半夜聲  
腸斷十三絃上月  
一絃一柱總關情

題梨花斑鳩圖

繡頸爛斑錦翼齊  
梁園春樹好飛棲  
樂遊年少偏嫌雨  
莫向花間自在啼

二馬圖

紫駟嘶逐玉花驄曾是沙場百戰功  
今日奚官重剪拂落花芳草灞陵東

高棟

早雁

涼霜八月塞天寒飛度衡陽楚水寬  
少婦樓頭初掩瑟一行先向夕陽看

王紱

花上白頭翁

欲訴芳心未肯休不知春色去難留東君亦是無情物  
莫向花間怨白頭

題竹贈潘晦初

燈下狂歌酒半醺興來為爾寫秋雲故人湖海如相問  
骨立蕭然似此君

題靜樂軒四首

前溪水泮綠生波好雨催花向曉過宿酒未醒眠未起

半窓紅日鳥聲多

竹几藤牀小硯屏薰風簾幕篆煙青閑齋幾日黃梅雨  
添得芭蕉綠滿庭

秋聲早已到梧桐露氣生涼湛碧空獨倚闌干待明月  
紫簫吹散木樨風

斗帳藏春日醉眠靜中惟與懶相便尋常甲子無心記  
看到梅花又一年

小喬觀書

雲髻新妝珠翠團杏花零落曉風寒每憐春事傷心處  
偷把周郎曲譜看

寫竹寄俞潮宗先生

與君一別十年餘每見人來問起居盡說丰神清似竹  
霜明鬚髮影疎疎

題畫

汀洲潮落雨初晴獨坐蘭舟酒半醒欲採芙蓉過江去  
迢迢秋水數峰青

題竹

宮樹棲鴉拜夕郎  
洞門煙靄竹蒼蒼  
珮聲搖曳歸來晚  
香篆初消月到牀

峽中雜詠

峽裏山高多晝陰  
未昏煙景暗秋林  
停舟晚飯柁樓底  
猶有夕陽明遠岑

皆山軒

嵐光飛翠入簷楹  
枕簟生涼暑氣清  
公退日斜新浴罷



坐看峰影過州城

題靜照軒

尋常客不到山家  
松火寒爐自煮茶  
風雪閉門才十日  
不知春已到梅花

題枯木竹石寄李公實

罨畫溪邊水拍堤  
繞堤高樹倚雲齊  
君家正在樹深處  
滿地綠陰山鷓啼

茅齋煮泉圖

小結茅齋四五椽  
蕭蕭竹樹帶秋煙  
呼童掃取空階葉  
好煮山廚第二泉

曾烜

秋夜

何處偏能斷客腸  
西風吹雨到池塘  
都將萬疊青山恨  
散作離愁一夜長

熊直

瀟湘雨意圖

萬竹叢深日未晡  
寒江煙雨翠模糊  
東風無限瀟湘意  
却倚蓬窓聽鷓鴣

薊門秋夕

清漏遲遲月轉廊  
博山消盡水沈香  
重城不鎖還家夢  
雨夜分明到故鄉

陳繼

偶成三首

紫陌輪蹄蹴暖塵  
野猿啼處盡遊人  
相逢共道看花去

逕草誰憐也得春

嵐翠霏霏濕澗蘿青山應喜我來過  
莫教杜宇催春去  
花落東風已自多

蘋浦涼風裊鬢絲釣魚兼得賦新詩  
舟移不向江橋泊  
意在西巖日暮時

題挾彈圖

白馬雕鞍艷綺羅東城南陌遍經過  
金丸且莫輕拋擲  
綠樹春深乳雀多

題月下裁衣圖

香幃風捲月團團  
睡起裁衣思萬端  
秋葉未紅金剪冷  
玉門關外不勝寒

陳亢宗

題倪雲林碧梧翠竹圖

梧竹聯陰翠欲飛  
茅亭雲散客初歸  
誰能為我揚焦尾  
操作清風滿布衣

徐晞

感懷

年年騎馬戰龍沙  
不道功成兩鬢華  
昨夜思歸有鄉夢  
江南春色遍梅花

劉廌

春游田家四景之一

竹籬茅舍兩三家  
屋外青山綠樹遮  
行客偶來春已暮  
山南山北杜鵑花

郭武

宿澧陽

蘋花風急水茫茫  
今夜孤舟宿澧陽  
誰在江城吹畫角  
五更殘月一天霜

秋夜懷句曲山隱者

清霜木葉空  
塔滿靜夜鐘聲獨  
坐聞遙想  
山中人未宿  
自拈香炷禮秋雲

曾榮

揚州

翠袞紅燭坐調笙一曲嬌歌萬種情二十四橋春水綠  
蘭橈隨處傍花行

憶別

一家去住兩關情行李蕭然又出京記得別時寒食後  
斷煙殘雨石頭城

即事

片片飛花逐水流傷春何處最多愁紅妝獨倚闌干立  
望盡征帆不下樓



靜海感書

紅燭當壚夜數錢  
驛亭西面綠楊邊  
重來煙景渾依舊  
只認青帘記昔年

旅懷

十年京國鬢蕭蕭  
薊北江南萬里遥  
家去潯陽猶尚遠  
莫將音信托寒潮

夾溝

東風吹暖柳絲柔  
十里青山遶夾溝  
馬上逢人相借問

計程兩驛到徐州

夏日即事

茅亭瀟灑樹陰中  
曲曲疎櫺面面風  
樹色似煙花似火  
石榴開遍幾枝紅

房櫳如水午陰清  
六月涼生白紵輕  
院落晝閒人語靜  
萬條垂柳一蟬鳴

雨苗煙蔓綠交加  
瓠葉低垂豆著花  
日晚呼童開後圃  
旋薤畦草種秋瓜

薊門秋夜四首

錄三首

睥睨鴉兒散曙暉  
香煙滿袖退朝歸  
西園只許清風到  
不放紅塵半點飛

瑣窓朱箔暖雲低  
雪色屏風畫竹枝  
對客不知天向夕  
幾回燒燭了殘棋

彩毫銀管墨花香  
鎮紙狻猊紫石光  
欲試新來銅雀硯  
臨池塌得十三行

陳敬宗

白蓮

太液澄波濯素容  
玉衣垂影水晶宮  
月明無處尋顏色  
只信香飄十里風



總校官庶吉士臣侍朝

校對官編修臣莫瞻菴

謄錄監生臣張槎

欽定四庫全書薈要

集部

御選明詩卷一百四

詳校官原任主事臣李斯咏

欽定四庫全書薈要卷一萬八千六百四集部

御選明詩卷一百四

七言絕句四

王英

淮安別回御史

遠別悠悠鄉夢頻逢君況是異鄉春可憐  
河畔青青柳又折長條別故人

舟過孟城

畫船撸鼓過孟城兩岸桃花春水平  
今夜湖中好風景  
直須看到月三更

王直

題畫

綠樹青山帶晚霞樹間處處有人家  
孤舟最愛滄浪客  
得共眠鷗占淺沙

章敞

長安雪夜歸興



半生歲月老幽燕  
鏡裏蒼顏豈似前  
曾道休官身便樂  
夢書封事乞歸田

李昌祺

客夜聞砧

荒草蕭蕭郭隗臺  
清砧明月兩堪哀  
千愁百感多如雨  
今夜燈前一併來

山路謔花

枝頭地上總猩紅  
幾樹繁開幾樹空  
顏色一般榮悴別

誰將此意問東風

花答

多謝天公著意裁不教妝點艷亭臺  
無人翦折無人賞贏得年年自在開

梔子畫眉圖二首

蒼筤初開雪亞枝枝頭好鳥立成癡  
少年京兆風流處似汝花間對語時

昔年曾伴董嬌嬈長把春山笑倩描  
今日梁園空見畫

鳥啼花落鬢蕭蕭

夜雨

得失無心總不驚  
秋來偏動故鄉情  
平常窓外梧桐雨  
不似今宵不耐聽

魏驥

題畫

良夜迢迢月正明  
石欄杆外坐深更  
掀髯笑罷歌還續  
愛殺林居此段情

翠水丹山足賞心  
渚荷汀柳夏初臨  
推蓬一曲昇平調  
不識何人是賞音

題小畫四景

落紅無數正春深  
小艇移來泊水潄  
滿目青山如畫好  
欲從何處覓知音

陰森夏木倚巖阿  
小小軒窓掩薜蘿  
只恐故人歸未得  
扁舟何日更相過

千巖萬壑晚偏奇  
護却幽居也自宜  
秋色滿天人不見

一舟溪上泊多時

溪南溪北雪紛紛訪友尋梅懶出村  
冰滑小橋人跡斷獨宜煨火閉柴門

郊行二首

楝子花香雨正過秧針刺水漸平  
坡太平無限田家樂願雜春農著短蓑

楊柳人家燕子飛綠濃緣徑覓紅稀  
多年不踏鄉關路最喜青山待我歸

晚步

棟花風起燕飛飛  
步出溪橋一逕微  
最喜晚來詩趣好  
山光水色淡斜暉

聞鳥聲

金臺蘭省望都迷  
兀坐晴窓日漸西  
喜助老懷吟好處  
幽禽飛傍綠陰啼

晚步

扶筇石逕步遲遲  
林壑涼生暑退時  
老去清懷聊自遣

看山看水只題詩

著霜紅樹晚離離  
香糯香粳熟漸齊  
白袷烏巾筇竹杖  
江鄉風景不勝題

林真

粵王臺

屠龍人去幾時歸  
空有高臺對夕暉  
回首舊時歌舞地  
年年春草鷓鴣飛

錢榦

客夜與故人話舊

與君秋鬢各成霜  
老大相逢在異鄉  
盡日不眠詢往事  
雨聲寥落小窓涼

陳鎰

懷慶道中

風捲塵沙驛路迷  
人家遠近樹高低  
如何河北風光別  
春半猶無一鳥啼

金誠



江行秋興

江水悠悠江路長  
孤鴻啼月有微霜  
十年蹤跡渾無定  
莫更逢人問故鄉

閨情

欲剪紅霞作舞衣  
薄雲涼霧共霏霏  
玉簫吹冷天邊月  
只待乘鸞子晉歸

黃閨

和空侗生春日看花之作

多情才子惜春華  
樂府新聲對客誇  
朱雀橋邊舊遊路  
東風開遍小桃花

劉鉉

題曹雲西山水

碧雲消盡好山多  
茆屋春深長薜蘿  
行處聽來心自愜  
野禽啼罷野樵歌

題沈孟淵所藏王叔明竹二首

風露生寒夜若何  
月高山館覺秋多  
湘靈正作南歸夢

莫向江頭唱楚歌

煙雨苕溪憶舊遊  
畫圖遺墨見風流  
不知黃鶴飛歸後  
又是山中幾度秋

薛瑄

夏日出文明門

文明門外柳陰陰  
百轉黃鸝聽好音  
行過御溝回望處  
鳳凰樓閣五雲深

新鄭學宮夜宿

清飈撼撼響林柯  
夜宿秋堂冷簟波  
睡醒不禁鄉思切  
滿庭明月候蟲多

黔陽山中

景好寧知是異邦  
竹籬茅舍枕蒼江  
吏情更有山林趣  
綠樹門前畫戟雙

黔陽春日雜詠

駐節黔中感歲華  
四山重疊繞天涯  
空庭獨坐聽鳴鳥  
拂面春風吹柳花

早渡古嶢關

四圍山勢鬱崔嵬  
清曉關門傍水開  
一騎秋風揚策度  
野花隨路送香來

山水小景

湖水茫茫浪拍天  
春風湖上有人煙  
小樓半在花林內  
簾捲青山看釣船

題錢舜舉山水小景

琪樹秋風生早寒  
樓臺縹緲暮雲間  
橋頭有客長無事

閑聽溪聲靜看山

益陽山行遇雨

雲林漠漠雨淒淒  
節節危橋曲曲溪  
可是青驄行處穩  
滿山紅葉襯秋泥

汾上春行

清汾信馬踏春酣  
汀草萋萋隴麥蘄  
正是暖風啼鳥日  
水村花塢似江南

朝天驛

征驂行盡褒南道又上朝天驛畔舟兩岸雲林青未了  
嘉陵南去水悠悠

放船

野曠天低江面平放船東下好風清江天況值新晴霽  
雲白山青望眼明

江行

兩岸好山看不盡一江煙水去無窮誰人為和滄浪曲  
興在空濛杳靄中

平羌望峨眉山

我眉畫出天邊秀青到平羌尚未休  
山月半輪懷李白扁舟我亦下渝州

于謙

暮春小雨

霏霏小雨不沾衣細逐斜風密又稀  
好濕香塵黏柳絮莫教零落送春歸

夏日憶西湖



湧金門外柳如煙西子湖頭水拍天  
玉腕羅裙雙蕩槳鴛鴦飛近採蓮船

平陽道中

楊柳陰濃水鳥啼豆花初放麥苗齊  
相逢盡道今年好四月平陽米價低

上太行

西風落日草斑斑雲薄秋容鳥獨還  
兩鬢霜華千里客馬蹄又上太行山

野景

千山萬山白雲起  
三片五片紅葉飛  
野寺蕭條門半掩  
夕陽滿地一僧歸

詠石灰

千槌萬鑿出深山  
烈火叢中煉幾番  
粉骨碎身都不顧  
只留清白在人間

瞿佑

清明

兼旬蹭蹬在京華又見東風御柳斜  
客裏不甘佳節過  
偕人亭館看梨花

過蘇州二首

白蓮橋下暫停舟  
垂柳陰陰拂水流  
舞榭歌樓俱寂寞  
滿天風雨過蘇州

桂老花殘歲月催  
秋香無復舊亭臺  
傷心烏鵲橋頭水  
猶望閭門北岸來

偶桓

為沈趣菴題畫

溪山深處野人居  
小小簾櫳草閣虛  
灑面松風吹夢醒  
凌霄花落半牀書

懷友次陳石泉韻

楓林葉赤露華濃  
來往晴沙一逕通  
遙望美人秋水隔  
蘋花吹老楚江風

王孟端墨竹

鳳池退食寫琅玕  
醉墨淋漓尚未乾  
寄贈故人如有意

清風日日報平安

謝縉

春思

簾幕風微篆有香  
起來時候已斜陽  
梨花雲冷不成夢  
蛺蝶一雙飛過牆

寄王廷桂

山連罨畫雲煙好  
路入苕溪水木清  
如此江南好風景  
故人何事不歸耕

寒食村中

流水涓涓映淺沙  
石林風急亂啼鴉  
荒村寒食無人到  
何處香來枳殼花

漫興

村村昏黑樹陰濃  
咫尺湖塘路不通  
夜半風來雨吹散  
櫂歌依舊月明中

施敬

南行途中寄錢塘親友

萬里移家入瘴煙故鄉音耗若為傳衡陽自古無來雁  
況去衡陽又八千

讀程原道昆陽詩悵然有懷

昆陽市上美人家飲酒曾停過客車萬里相思不相見  
東風吹盡蜜檀花

試筆

試筆山窓竹影涼閑臨小字換鵝章定巢燕子時飛過  
帶得殘花落紙香

曹溪夜泊

空山孤驛鼓逢逢  
明月流輝滿大江  
水鳥夜寒棲不穩  
一雙飛影過蓬窓

陸顥

吳江道中

鱸肥蓴脆正秋風  
綠水紅橋宛轉通  
不獨季膺思故里  
扁舟吾亦戀吳中

李孝謙



題畫

溪頭春水碧粼粼  
溪上春山絕點塵  
不信白雲都占盡  
也應苑屋有閑人

林枝

寄彭韞玉

空齋牢落思寥寥  
荏苒年光逝水消  
憶得當時分袂處  
柳花如雪過江橋

劉績

月夜獨坐憶錢塘遲師房聽施彥昭摘阮

忽思吳客四條絃出谷新鶯咽洞泉一曲醉翁何處聽  
冬青樹底佛堂前

畫馬

雙駒汗血已斑斑蹀躞春風意態閒聞道千金求駿骨  
不應龍種在人間

李迪畫蘆雁

遠別胡天趁稻梁秋風吹斷不成行夜深獨宿江南渚

夢怯黃蘆葉上霜

錢遜

琵琶士女

下馬陵西是妾家十三曾學理琵琶  
自從流落商船上幾度春風怨落花

斑鳩

鬪草歸來女伴尋遊絲飛絮惱春心  
紫鳩聲歇鑪煙冷門掩梨花暮雨深

何澄

題畫雁

蘆花瑟瑟水茫茫落月沈沙夜未央  
離思不禁天外雁孤舟燈火客三湘

吳鎮

重過沙河有感

白鶴沙頭水自波扁舟曾載夕陽過  
東風一路薜蘿綠添得春愁別後多

吳子恒

高洲

青山西峙水流東  
暘谷縈紆一道通  
老去相知一藜杖  
天邊扶我最高峰

錢復亨

寄陸致中

長憶離亭數斷鴻  
碧山千里暮雲紅  
欲知別後愁多少  
都在寒江暮雨中

題畫

娟娟涼風斷復連  
青山深處藕花邊  
誰家樓外停歌舞  
又上西湖十錦船

蔡庸

徐氏席上聞歌有感二首

休遣雙鬟唱竹枝  
聽來渾不是當時  
自從夢隔巫山雨  
贏得秋風宋玉悲

暗將羅扇遞新聲  
巧似東風柳樹驚  
唱徹梨園譜中曲

內中一曲最關情

李進

西湖夜宿

塞驢衝雪岸烏紗夜醉西湖賣酒家十六吳姬吹鳳管  
捲簾燒燭看梅花

李勗

山水便面

峰巒迢遞水微茫葭菼連天雁噉霜彷彿湘南舊行路

短篷秋色近斜陽

胡紀

寄懷翁復初二首

曾對東風倒玉壺  
花前痛飲醉相扶  
湘山此日君思我  
苦竹叢深聽鷓鴣

別後茫茫歲月催  
眼看花謝又花開  
相思莫道書難寄  
落雁峰前有雁來

王佐



瓊州二首

斷虹飲海日光移西北雲屯少定姿  
颶母呼風千里至  
三間茅屋可能支

五指分山析四州那盆峻嶺却當頭  
一支瀉下朝東水  
去與瓊州作上流

沐璘

午日

蛇首裝船十丈長船頭鑊鼓間笙簧  
百夫劃槳齊聲去

阿瓦城河沸似湯

廖俊

西良湖

南邦遺跡在西良  
鳬雁依然滿石梁  
我向浮洲臺上立  
不勝惆悵到斜陽

潘亨

聞子規

崎嶇蜀道馬行遲  
到處空山有子規  
慎莫夜啼枝上月

思家正是夢回時

盛寅

暮春雜詠

青青楊柳拂簷牙  
杏酪香來客念家  
惆悵墓田吳苑曲  
幾年寒食在京華

沈貞

題竹贈施堯卿

冷煙籠翠濕晴梢  
江月沈時影漸消  
正是故人相憶處

秋聲無雨亦蕭蕭

沈恒

題劉廷美畫

十載天涯作宦遊  
黃塵飛滿紫貂裘  
歸來不歎長途險  
猶寫關山萬里秋

陳顥

夜坐

寒來塵緒不闌情  
吟對青燈過二更  
落葉滿庭風滿樹

小窓無處著秋聲

立春

蕭條書劍客邊身  
望望歸期過立春  
官柳漸黃梅已白  
東風應笑未歸人

李迪

郊遊

栗杖風前處處扶  
林花掩映失前途  
兒童也喜尋春客  
說與東村賣酒壚

張翥

題海棠雙鳥

雙雙何事為春忙  
花底飛來羽翼香  
今夜且留枝上宿  
莫燒銀燭照紅妝

杜瓊

竹

露葉風梢接水鄉  
幾回相對憶瀟湘  
寒雲流水斜陽暮  
一曲清歌斷客腸

竹下水仙花

珮環香冷水風多步底輕塵襯襪羅二十四絃何處奏  
又將哀怨託湘娥

秦旭

題畫梅

沙際春煙濕未消落梅風急送輕橈江邊有客尋詩去  
應在西湖第六橋

梁時

題張子正春雨鳴鳩圖

自解呼名繡領齊梨雲竹雨暗寒溪東風却憶江南北  
桑柘村深處處啼

題畫

炊煙生處是柴關只隔前溪半里山偶展漢書隨意讀  
不教牛角掛空還

沈澄

題畫



採盡芙蓉秋不知水聲流去少年時  
西風吹醒江南夢  
月色滿船歌竹枝

寄陳怡菴

十年千里各天涯  
盼得還家會面遲  
雲冷夜窓聽雨坐  
相思却似未歸時

高得暘

題王叔明枯木竹石

吾鄉畫手鶴山樵  
鶴去山空不可招  
真跡幸留王宰石

疎篁老樹共蕭蕭

侯復

題櫻桃翠羽圖

幾點丹砂照綠陰  
瑤池內使翠霞襟  
東風何處曾相識  
沈水香消午院深

姜洪

題畫

碧山高樹雨初晴  
風動懸蘿雜鳥聲  
簾幙晝垂茅屋靜

幽人何處斲黃精

王誼

宮詞

花樹重重隔翠華  
玉顏無事駐羊車  
碧紗籠裏銀釭影  
照見深宮夜合花

春思

山映簾櫳水映窓  
浣紗人在苧羅江  
年年三月梨花雨  
門掩東風燕子雙

王懌

歌妓

銀燭前頭見楚蓮  
雪香輕袂掌中旋  
章華臺上春風起  
一片楊花拂玳筵

沈淳

閒居

天上抽簪萬里迴  
秋風黃菊滿籬開  
翟公不復為廷尉  
辜負賓朋日往來

劉珏

泊舟垂虹橋

貫酒烹鱸敵暮寒垂虹橋上倚闌干行人笑指詩翁嬾  
不到城中訪縣官

梅

歲寒相見在天涯玉色珠光帶露華笑殺玄都狂道士  
種桃何不種梅花

張和

晚渡石湖

畫船搖曳水雲鄉  
湖上南風作晚涼  
醉擊唾壺歌小海  
藕花飛出兩鴛鴦

祝顥

小李將軍院體小幅

金屋瓊臺擁畫樓  
錦雲香滿采蓮舟  
人間盡道仙家樂  
不識霜娥有底愁

沙沱晚行

野曠天青落日黃西風衰草白茫茫停驂四望行人絕  
一片寒雲逐雁行

成始終

山家

竹籬茅屋似儂家細路緣江盡白沙落日叩門山客至  
鷓鴣啼上石楠花

倪謙

題白鹿仙人圖

百尺松陰石磴重  
千年白鹿澗邊逢  
仙人月底吹簫去  
知向縑山第幾峰

商輅

桐江獨釣圖

拂袖長歌入富春  
滄江深處獨垂綸  
短蓑不換軒裳貴  
千載高風有幾人

葉盛

曲子驛



戎衣脫却下蕭關  
坐對環泉半日間  
未是老來筋力倦  
馬蹄歸自賀蘭山

陳獻章

初晴

初晴樓上燕飛飛  
樓下歌人白苧衣  
一曲未終花落去  
滿枝啼鳥送春歸

贈釣伴

短短萋萋淺淺灣  
夕陽倒影對南山  
大船鼓枻唱歌去

小艇得魚吹笛還

社中

桑林伐鼓酒如川  
秋社錢多春社錢  
盡道昇平官長好  
五風十雨更年年

社屋新成燕子來  
山丹未落野棠開  
三三兩兩兒童戲  
弄水扳花日幾回

社酒開顏一百家  
春風先動長官衙  
東君也解遊人意  
紅白交開樹樹花

社日年年會飲同東原西塋鼓鼙鼙無人不是桃花面  
笑殺河陽樹上紅

元夕

村南村北此宵同好景難消一老翁在處恐妨年少樂  
踏歌歸去月明中

古耶道中有懷

翠煙浮壠麥初齊社樹青青獨鳥啼何處相思不相見  
木棉花下水門西

即事

照眼春光爛不收  
江亭一雨欲成秋  
道人不是閒鶯蝶  
肯為陰晴一日愁

彈子磯候默齋不至

軍人打鼓泊官船  
黑霧濛濛水下灘  
隔岸相呼不相見  
竹籠牽火上桅竿

鄒吏目書至有作

落花遥對石城春  
半篋殘書一病身  
茶甌粟餅供客盡

不妨人笑長官貧

木犀四絕寄倪麟

錄二首

正月山桃委地紅  
柳塘還捲落花風  
木犀一樹渾堪賞  
盡日相看煙雨中

風吹雨打只傷神  
白首龍鍾尚愛春  
花意未應嫌老醜  
十年前是種花人

題畫

茅簷秋颭酒旗風  
舟入蒹葭月半籠  
醉睡不知家遠近

醒來依舊五湖東

寒山鐘近不成眠  
人在姑蘇半夜船  
何處明朝正堪望  
吳王宮苑草芊芊

次韻黃澤飲酒見寄

南山北山花笑人  
有酒不肯延嘉賓  
請君試向西園看  
又減黃鸝一半春

送林時嘉

南川夢裏舊青湖  
何處青燈一榻孤  
留取幽禽守明月

隔林還與盡情呼

追和白石馬教授奉寄其玄孫馬竹隱

山深谷冷老煙霞  
君住孤村第一家  
一榻清風明月夜  
鉤窓閒對紫薇花

夜坐

露冷風清正酒醒  
誰家今夕不勝情人間  
老去無愁思  
獨倚疎梅看月明

岳正

致仕後戲作

五十年來謝世紛百年勞逸喜平分不應又受先生號  
去與青山管白雲

劉珣

白頭鳥

殘綠枯荷八月秋枝間獨立更遲留憐渠本是無情物  
何事而今也白頭

一鷺圖



芳草垂楊蔭碧流  
雪衣公子立芳洲  
一生清德無人識  
獨向斜陽歎白頭

汪回顯

聞猿

使蜀三年未得歸  
青山樓閣倚斜暉  
猿聲久聽渾閒事  
却笑巴人淚滿衣

鄭文康

寄海上韓杲

行盡清溪到水涯  
好山環繞故人家  
寥寥一犬柴門外  
只隔牆東幾樹花

前元時崑山王君祐有玉立亭會稽楊廉夫嘗  
飲其中題詩曰王郎崑之秀玉立而長身亭子  
如筮大不直一欠伸亭前千尺峰倒景入座濱  
燒琴有爨桐漉酒有烏巾客來塞屋破露坐草  
上茵時時來鐵叟共酌羅浮春題曰令小朶雲  
捧硯為賦此章君祐之宗孫益復亭其地予亦

為賦二絕

亭中曾寫鐵仙詩人去亭荒碧草滋千尺危峰今尚在  
重來磨洗認當時

玉立長身舊主君百年遺事至今聞宗孫賓客還如舊  
只欠楊君小朶雲

倪敬

題畫

溪雲靄靄樹團團溪上幽亭六月寒日暮看山人已去

水禽飛上石欄干

夏寅

梅邊美人

欲向東風問早春  
閒來花底步香塵  
試看一種嬋娟態  
即是羅浮夢裏人

芭蕉美人

曉妝纔罷思徘徊  
羅襪輕移步綠苔  
試向芭蕉問春信  
一緘芳札為誰開

周鼎

淮南道中

葦屋蕭蕭暗市塵縱多花柳不成春  
車聲自繞東風展  
不管天涯有遠人

偶成

玉河橋下水如車楊柳當門是我家  
飛過紅塵三四點  
有人騎馬向東華

寄陳叔莊

郭外何須二頃田江湖春水綠如煙扁舟蕩漾不歸去  
日暮蘋花風滿川

許時無暇出城來漫盡溪橋是綠苔寄語山中舊猿鶴  
紫薇花欲為誰開

郭登

口號寄涇州守李宏

渡了黃河又黑河春風秋月五年過涇陽太守如相問  
更比來時白髮多

至高郵逢邢勉仁

客中相見倍相親  
白酒黃雞莫笑貧  
君住淮南我淮北  
如何不是故鄉人

送人回京

迎得君來復送君  
櫻桃花發又經春  
誰知萬里南征客  
却向滇陽作主人

王肆

題謝孔昭雨中過沈孟淵所詩畫

竹邊書屋柳邊舟白髮相逢酒一甌回首舊遊成遠夢  
滿林風雨不勝秋

題沈公濟雪中過沈孟淵所詩畫

白髮交游二隱淪西莊一別幾經春雪中客有重來日  
不見當年冒雨人

楊守陳

送僧歸吳

一錫南飛度碧空寶坊遙在白雲中定知門外青松樹



別後新枝已向東

春寒

二月燕城暖漸回  
北風吹雪徧樓臺  
春寒畢竟無多日  
桃李何須怨未開

春城遊宴詩

蝤蛸石首和椒橙  
新筍香甘帶肉烹  
非是老饕偏愛此  
十年不斂故鄉羹

童軒



春雨思兄一首

輕寒連日雨霏霏  
花底香塵濕不飛  
燕子歸來詩夢覺  
滿池新水草依依

墨竹

湘江千畝綠雲寒  
分得凌霄玉一竿  
因憶當年棲泊處  
滿篷秋葉雨聲閑

春夜偶成

金鴨香消午夜天  
粉牆西畔控秋千  
荼蘼夢怯春寒峭

起傍雕闌看月圓

春草

年年匝地自生春  
染出羅裙色更新  
回首舊遊南浦路  
冷煙淒雨正愁人

寶帶橋

寶帶橋頭水滿磯  
小舟雙槳暮漁歸  
藕花蒲葉俱零落  
惟見斜陽乳葉飛

褒城

曉驅羸馬出褒城風景蒼蒼入望清十里青山數行樹  
豈花籬落草蟲鳴

壽昌山中書事

竹底寒泉脈脈流穿雲噴雪響牀頭連宵獨坐清無寐  
那更山窓月正秋

王越

春寒

二月邊城雪尚飛年年草色見春遲不知上苑新桃李

開到東風第幾枝

謝安圖

高卧東山歲月多  
放情聲妓欲如何  
後來始為蒼生起  
却聽桓伊席上歌

馬文升

游桃源洞

桃花源接武陵溪  
咫尺仙家路易迷  
指點秦人舊蹤跡  
蕭蕭方竹斷橋西

李應禎

春日山村晚步

寂寂柴門草色新  
深深雲樹鳥啼春  
夕陽西下東流急  
不見沙頭喚渡人

謝績

山行

杖屨躋攀到九華  
不知何處是仙家  
高蹤一去無消息  
惟有碧桃春自花

張寧

園梅盛開

暖透孤根雪乍消  
冰花萬點綴寒條  
尋幽欲寄山中客  
忘却西湖有斷橋

題畫

杳靄昏黃夜泊船  
鷓鴣聲裏雨如煙  
秋風不見平安信  
夢斷湘江又十年

竹鶴老人畫

水煙山靄樹冥冥船在丹青畫裏行好是苕溪二三月  
南邊雨落北邊晴

蘋花館

宿水停煙綠近牆繞門葭菼共蒼蒼寒香欲薦無人采  
月落空庭夜有霜

寄余驛丞

南薰亭館晚相延屈指星霜又十年不是重來渾忘却  
黃昏舟過驛門前



丘濬

題小景

石橋流碧水潺湲千樹桃花萬疊山  
謾道仙家有靈藥  
看來終不似人間

過會通河有感

清江浦上臨清閘  
簫鼓叢祠飽餒餘  
幾度會通橋上過  
更無人說宋尚書

伍方

畫竹

花點湘雲墮碧川  
翠梢零落帶秋煙  
歸篷記得曾看處  
殘月黃陵古廟前

彭澤

春日雜興

春陰庭館晝生寒  
落葉遊絲濕作團  
年少風流今減盡  
牡丹開遍不凭闌

陳頌

題石田小景

齊女門北古塘斜岸葦無窮雜蓼花此地往來應慣熟  
借書常到鄴侯家

陳贄

蠻中

蠻溪雨過葉皆流落日猩猩啼樹頭高竹亂藤茅屋小  
不知村落屬何州

劉英

載酒過湖

寒食清明次第來紫苞紅萼裏池臺東風似與人商略  
最好花教最後開

聶大年

題畫

緩鞚青驄蹋軟沙畫橋煙樹酒旗斜玉樓人醉東風晚  
高捲紅簾看杏花

題彥顥畫中小景

水禽沙鳥自相呼  
遠近雲山半有無  
一葉扁舟兩三客  
載將煙雨過西湖

雨餘芳樹淨無塵  
草色蒙茸淺帶春  
茅屋石田應尚遠  
夕陽愁殺獨歸人

夏日次侃禪師韻

高亭暑夜景相和  
涼月絺衣挂薜蘿  
楊柳風輕湖面潤  
不知何處藕花多

題許上舍家梅花

西湖曾繫木蘭橈  
湖上殘雲雪未消  
報道南枝春信早  
移船更近段家橋

題仲昭竹

舍人老作鄖陽守  
尚愛揮毫寫竹枝  
絕似槎舟湘水上  
鷓鴣啼斷雨來時

陳延齡

題畫

洞庭微雨曉生波  
一櫂雲山客裏過  
綠遍蘼蕪歸未得

東風閒唱竹枝歌

楊花如雪正殘春  
新水茫茫浸綠蘋  
桃葉桃根何處是  
東風愁殺渡江人

劉溥

題畫寄徐州陸九皋

別後重來未有期  
且憑圖畫寄相思  
秋風黃葉茅亭上  
猶記逢君是此時

目極天涯酒半醒  
楓林斜帶遠山青  
故人家在秋雲外

百步洪邊水繞亭

偶作

燈影分明隔絳橋  
玉堦行盡轉迢迢  
春風只在銀屏裏  
殘雪和愁幾日消

詠哀柳

露葉煙梢翠色浮  
向人長是弄春柔  
多情自是多顚顚  
莫向西風錯怨秋

湯肅勳



立春後作

市橋連日雨聲繁  
花信風來第幾番  
郭外有田三十畝  
角巾扶醉插山礬

斷頭船子小於梭  
綠柳隄邊拍櫂過  
綽約酒旗風外捲  
隔花時聽一聲歌

霏霏小雨作春寒  
酒盞新來不放乾  
家近碧山招飲洞  
可能黃髮老江干

梅花卷

夢裏仙人水月容步搖斜颭玉籠鬆六銖衣薄霜風老  
吹落瑤臺第幾重

懸崖梅

半吐幽山雪未殘玉樓人墜曉風寒斷橋西向馬蹄滑  
曾岸秦巾仰面看

桃花雙鶴

白髮參軍賦欲成桃花浪急午風驚可憐一片蕪城月  
子夜還從海上生

遊仙

花氣晴烘玉女窓  
飛泉觸石響淙淙  
武夷山主來登會  
鸞鶴周攢七寶幢

洞口桃花望欲迷  
春光正萃武陵溪  
白雲萬頃誰耕破  
一一都開種玉畦

冉冉紅雲覆紫臺  
春風四散碧桃開  
麻姑昨夜曾相約  
去測東溟淺處來

鶴筆斜披出市諠  
青霞窟裏聽啼猿  
半酣騎著壺公杖

直遡黃河到水源

若木枝頭露未乾  
五雲噴水浴鴉翰  
須臾轉過金鰲背  
九點齊州鏡裏看

日照雲中絳節高  
龜臺阿母召餐桃  
乞來斗大黃瓊核  
剖作雙杯捲翠濤

巨俠

獵火茫茫照四山  
青衣小隊射生還  
貂裘幾點輕盈雪  
月照城門未上鐶





御選明詩卷一百四



總校官庶吉士臣侍朝

校對官編修臣莫瞻菴

謄錄監生臣張槎